



Keadaan treler yang membawa muatan kayu bergergaji terjatuh ke dalam gaung akibat kemalangan tersebut. - Foto Ihsan PDRM

Dua treler hilang kawalan, terbalik

ROSILAWATI ROSEDI | | 01 Ogos 2022

BENTONG - Dua pemandu treler cedera selepas kenderaan dipandu mereka terbabit dalam kemalangan di Kilometer (KM) 43.3 Lebuhraya Kuala Lumpur-Karak hala timur pada Jumaat lalu.

Ketua Polis Daerah Bentong, Superintendan Zaiham Mohd Kahar memberitahu, kemalangan kira-kira jam 7 pagi itu melibatkan mangsa berusia 24 dan 30 tahun.

Menurutnya, hasil siasatan mendapati, treler yang membawa muatan besi buruk dipandu lelaki berusia 24 tahun dari Pelabuhan Klang menghala ke Kuantan.

"Treler tersebut telah hilang kawalan, terbabas dan terbalik berpunca dari hujan menyebabkan jalan licin serta basah.

"Selang beberapa minit kemudian, datang sebuah treler membawa muatan kayu bergergaji cuba mengelak ke kiri jalan menyebabkan kenderaan yang dipandu lelaki berusia 30 tahun itu hilang

kawalan dan terlanggar batu penghadang jalan lalu terbalik masuk ke dalam gaung," katanya dalam satu kenyataan pada Isnin.

Rakaman kejadian ini juga turut tular di media sosial melalui TikTok akaun milik @Eynaredho.

Mohd Zaiham berkata, akibat kemalangan tersebut pemandu treler besi buruk telah mengalami kecederaan di bahagian belakang badan, tangan kiri dan kaki kanan dan dihantar ke Hospital Bentong untuk rawatan.

"Pemandu treler kayu tersebut pula mengalami kecederaan patah kaki dan tangan kanan serta bahu kiri serta mendapat rawatan di sebuah hospital swasta.

"Kes disiasat mengikut Seksyen 43(1) Akta Pengangkutan Jalan 1987," katanya.

Sementara itu, beliau juga memberitahu, sebanyak 224 kes kemalangan dicatatkan melibatkan pelbagai jenis kenderaan sepanjang Januari hingga Julai tahun ini di KM40-50 di Lebuhraya Kuala Lumpur-Karak.

"Kereta mencatatkan jumlah kes tertinggi iaitu 164 kes diikuti lori (24), lain-lain(22) dan motosikal (14)," tambahnya.

Artikel Penuh : <https://www.sinarharian.com.my/article/214155/BERITA/Semasa/Dua-treler-hilang-kawalan-terbalik>

© 2018 Hakcipta Terpelihara Kumpulan Karang kraf